

韋江州集

蘇軾詩集
卷之四
PDG

韋刺史詩集卷第五

唐江州刺史韋應物著明尚書戶部郎華雲校

酬荅五十六首

期盧嵩枉書稱日暮無馬不赴以詩荅

佳期不可失終願枉衡門南陌人猶度西林日未昏庭
前空倚杖花裏獨留尊莫道無來駕知君有短轅

任洛陽丞荅前長安田少府問

相逢且對酒相問欲何如數歲猶卑吏家人笑著書告
歸應未得榮宦又知疎日日生春草空令憶舊居

假中枉盧二十二書亦稱卧疾兼訝李二久不訪
問以詩荅書因以戲李二

微官何事勞趨走服藥閒眠養不才花裏棋盤憎鳥污
枕邊書卷訝風開故人問訊緣同病芳月相思阻一杯
應笑王戎成俗物遙持麈尾獨徘徊

酬盧嵩秋夜見寄五韻

喬木生夜涼月華滿前墀去君咫尺地勞君千里思素
秉棲遁志况貽招隱詩坐見林木榮願赴滄洲期何能
待歲晏携手當此時

盧詩云歲晏
以爲期之句

酬鄭戶曹驪山感懷

蒼山何鬱盤飛閣凌上清先帝昔好道下元朝百靈白
雲已蕭條麋鹿但縱橫泉水今尚暖舊林亦青青我念
綺襦歲扈從當太平小臣職前驅馳道出灊亭翻翻日

月旗殷殷鼙鼓聲萬馬自騰驤八駿按轡行日出烟嶠
綠氛氲麗層甍登臨起遐想沐浴歡聖情朝燕詠無事
時豐賀國禎日和絃管音下使萬室聽海內湊朝貢賢
愚共歡榮合沓車馬喧西聞長安城事往世如寄感深
迹所經申章報蘭藻一望雙涕零

荅李泚三首

孤客逢春暮緘情寄舊遊海隅人使遠書到洛陽秋
馬卿猶有壁漁父自無家想子今何處扁舟隱荻花
林中觀易罷溪上對鷗閒楚俗饒辭客何人最往還

酬柳郎中春日歸揚州南郭見別之作

廣陵三月花正開花裏逢君醉一迴南北相過殊不遠

暮潮從去早潮來

酬豆盧倉曹題庫壁見示

掾局勞才子新詩動洛川
運籌知決勝聚米似論邊
宴罷常分騎晨趨又比肩
莫嗟年鬢改郎署定推先

酬李儋

開門臨廣陌旭日車駕喧
不見同心友徘徊憂且煩
都城二十里居在艮與坤
人生所各務乖闊累朝昏
湛湛尊中酒青青芳樹園
緘情未及發先此枉璵璠
邁世超高躅尋流得真源
明當策疲馬與子同笑言

酬元偉過洛陽夜燕

三載寄關東所歡皆遠違
思懷方耿耿忽得觀容輝
親

燕在良夜歡携闌中闐問我猶杜門不能奮高飛明燈
照四隅炎炭正可依清觴雖云酌所媿乏珍肥晨裝復
當行寥落星已稀何以慰心曲佇子西還歸

酬韓質舟行阻凍

晨坐枉嘉藻持此慰寢興中獲辛苦奏長河結陰冰皓
曜群玉發淒清孤景凝至柔反成堅造化安可恒方舟
未得行鑿飲空兢兢苦寒彌時節待泮豈所能何必涉
廣川荒衢且升騰殷勤宣中意庶用達吾朋

李博士弟以余罷官居同德精舍共有伊陸名山
之期久而未去枉詩見問中云宋生昔登覽末
云那能顧蓬華直寄鄙懷聊以爲荅

初夏息衆緣雙林對禪客枉茲芳蘭藻促我幽人策冥
搜啓前哲逸句陳往迹髣髴陸渾南迢遞千峯碧從來
遲高駕自顧無物役山水心所娛如何更朝夕晨興涉
清洛訪子高陽宅莫言往來踈駑馬知阡陌

寄酬李博士永寧主簿叔廳見待

解鞅先幾日款曲見新詩定向公堂醉遙憐獨去時葉
霑寒雨落鐘度遠山遲晨策已云整當同林下期

荅令狐工曹獨孤兵曹聯騎暮歸望山見寄

共愛青山住近南行牽吏役背雙驂枉書獨宿對流水
遙羨歸時滿夕嵐

荅李博士

休沐去人遠高齋出林杪晴山多碧峯顙氣疑秋曉端
居喜良友枉使千里路緘書當夏時開緘時已度簷籬
已颿颿荷露方蕭颿夢遠竹窻幽行稀蘭徑合舊居共
南北往來只如昨問君今爲誰日夕度清洛

荅劉西曹

時爲京兆功曹

公館夜云寂微涼群樹秋西曹得時彥華月共淹留長
嘯舉清觴志氣誰與儔千齡事雖邈俯念忽已周篇翰
如雲興京洛頗優遊詮文不獨占理妙即同流淺劣見
推許恐爲識者尤空慙文璧贈日夕不能酬

荅貢士黎逢

時任京兆功曹

茂才方上達諸生安可希栖神澹物表渙汗布令詞如

彼崑山玉本自有光輝鄙人徒區區稱嘆亦何爲彌月
曠不接公門但驅馳蘭章忽有贈持用慰所思不見心
尚密况當相見時

荅韓庫部

協

良玉表貞度麗藻頗爲工名列金閨籍心與素士同日
晏下朝來車馬自生風清宵有佳興皓月直南宮矯翮
方上征顧我邈忡忡豈不願攀舉執事府庭中智乖時
亦蹇才大命爲通還當以道推解組守蒿蓬

荅崔主簿倬

朗月分林靄遙管動離聲故驩良已阻空宇澹無情窈
窕雲鴈沒蒼茫河漢橫蘭章不可荅冲襟徒自盈

荅徐秀才

鉛鈍謝貞器時秀猥見稱豈如白玉仙方與紫霞升清
詩舞艷雪孤抱瑩玄冰一枝非所貴懷書思武陵

荅東林道士

紫閣西邊第幾峯茅齋夜雪虎行踪遙看黛色知何處
欲出山門尋暮鐘

荅長寧令楊轍

皓月升林表公堂滿清輝嘉賓自遠至觴飲夜何其宰
邑視京縣歸來無寸資瓌文溢衆寶雅正得吾師廣川
含澄瀾芳樹擢華滋短才何足數枉贈媿妍詞歡盼良
見屬素懷亦已披何意雲栖翰不嫌蓬艾卑但恐河漢

沒回車首路岐

荅馮魯秀才

晨坐枉瓊藻知子返中林澹然山景晏泉谷響幽禽
髣髴謝塵跡逍遙舒道心顧我腰間綬端爲華髮侵簿書
勞應對篇翰曠不尋薄田失鋤耨生苗安可任徒令慙
所問想望東山岑

荅崔主簿問兼簡溫上人

緣情生衆累晚晤依道流諸境一已寂了將身世浮閒
居澹無味忽復四時周靡靡芳草積稍稍新篁抽即此
抱餘素塊然誠寡儔自適一忻意愧蒙君子憂

清都觀荅幼遐

逍遙仙家子日夕朝玉皇興高青露沒渴飲瓊華漿解
組一來欸披衣拂天香粲然顧我笑綠簡發新章泠泠
如玉音馥馥若蘭芳浩意坐盈此月華殊未央却念誼
譁日何由得清涼疎松抗高殿密竹陰長廊榮名等糞
土攜手隨風翔

善福精舍荅韓司錄清都觀會宴見憶

弱志厭衆紛抱素寄精廬皦皦仰時彥悶悶平聲獨爲愚
之子亦辭秩高蹤罷馳驅忽因西飛禽贈我以瓊琚始
表仙都集復言歡樂殊人生各有因契闊不獲俱一來
田野中日與人事疎水木澄秋景逍遙清賞餘枉駕懷
前諾引領豈斯須無爲便高翔邈矣不可迂

荅長安丞裴稅

出身忝時士於世本無機爰以林壑趣遂成頑鈍姿臨
流意已淒采菊露未晞舉頭見秋山萬事都若遺獨踐
幽人蹤邈將親友達髦士佐京邑懷念枉貞詞久雨積
幽抱清尊宴良知從容操劇務文翰方見推安能戢羽
翼顧此林栖時

奉酬處士叔見示

挂纓守貧賤積雪卧郊園叔父親降趾壺觴携到門高
齋樂燕罷清夜道心存即此同疏氏可以一忘言

荅庫部韓郎中

高士不羈世頗將榮辱齊適委華冕去欲還幽林栖雖

懷承明戀忻與物累睽逍遙觀運流誰復識端倪而我
豈高致偃息平門西愚者世所遺沮溺共耕犁風雪積
深夜園田掩荒蹊幸蒙相思札款曲期見携

荅暢校書當

偶然棄官去投跡在田中日出照茅屋園林養愚蒙雖
云無一資尊酌會不空且忻百穀成仰嘆造化功出入
與民伍作事靡不同時伐南澗竹夜還澧水東貧蹇自
成退豈爲高人蹤覽君金玉篇彩色發我容日日欲爲
報方春已徂冬

荅崔都水

深夜竹庭雪孤燈案上書不遇無爲化誰復得閒居

酬令狐司錄善福精舍見贈

野寺望山雪空齋對竹林我以養愚地生君道者心

灋上精舍荅趙氏外生伉

遠跡出塵表寓身雙樹林如何小子伉亦有超世心擔
書從我遊攜手廣川陰雲開夏郊綠景晏青山沉對榻
遇清夜獻詩合雅音所推苟禮數於性道豈深隱拙在
冲默經世昧古今無爲率爾言可以致華簪

荅趙氏生伉

暫與雲林別忽陪鴛鴦翔看山不得去知爾獨相望

荅端

郊原夏雨歇閒院綠陰生職事方無効幽賞獨違情物

色坐如見離抱悵多盈況感夕涼氣聞此亂蟬鳴

荅史館張學士同柳庶子學士集賢院看花見寄

兼呈柳學士

班楊秉文史對院自爲憐餘香掩閣去遲日看花頻似
雪飄闐闐從風點近臣南宮有芳樹不並禁垣春

荅王郎中

卧閣枉芳藻覽旨悵秋晨守郡猶羈寓無以慰嘉賓野
曠歸雲盡天清曉露新池荷涼已至窻梧落漸頻風物
殊京國邑里但荒榛賦繁屬軍興政拙媿斯人髦士久
臺閣中路一漂淪歸當列盛朝豈念卧淮濱

荅崔都水

亭亭心中人迢迢居秦關常緘素札去適枉華章還憶
在澧郊時携手望秋山久嫌官府勞初喜罷秩閒終年
不事業寢食長慵頑不知何爲求名籍挂郎間攝衣辭
田里華簪耀顏顏卜居又依仁日夕正追攀牧人本無
術命至苟復遷離念積歲序歸途眇山川郡齋有佳月
園林含清泉同心不在宴尊酒徒盈前覽君陳迹遊詞
意俱凄妍忽忽已終日將酬不能宣昨稅况重疊公門
極熬煎責逋甘首免歲晏當歸田勿厭守窮轍慎爲名
所牽

荅王卿送別

去馬嘶春草歸人立夕陽元知數日別要使兩情傷